

# Årsmelding 2024 - Sykkylven kontrollutval

Kommunen er den viktigaste velferdsprodusenten i samfunnet, og forvaltar monalege ressursar på vegne av innbyggjarane. Omfanget av og breidda i den kommunale tenesteproduksjonen medfører behov for utstrekt styring og kontroll.

Kommunal eigenkontroll er den kontrollen kommunen sjølv gjennomfører i eiga verksemd. Eigenkontroll er eit viktig element i det lokale folkestyret, og skal medverke til at kommunen når dei måla som er sette, innanfor rammene av gjeldande regelverk og tildelte ressursar. Eigenkontrollen skal også medverke til å styrkje tilliten til forvaltninga gjennom førebygging og avdekking av mislege handlingar og andre uheldige tilhøve

## Om kontrollutvalet

Kontrollutvalet er kommunestyret sin reiskap og operative kontrollorgan. Det er kommunestyret som har det overordna kontrollansvaret for den kommunale verksemda.

For at kontrollutvalet skal vere ein god reiskap for kommunestyret, må kommunestyret gje kontrollutvalet gode arbeidsvilkår. Og leggje til rette for god samhandling mellom kommunestyret og kontrollutvalet.

Sykkylven kommunestyre valte kontrollutval i sitt møte 02.10.2023. I første utvalsmøte vart det orientert om kontrollutvalet sitt arbeid og mandat. Kommunelova § 23-1 gjev føringar på kven som ikkje er valbare til kontrollutvalet. Personar som har eit tilsetjingsforhold til kommunen og personar som er medlem eller varamedlem til styret i selskap som kommunen har eigarinteresser i, er ikkje valbare.

I møtet stilte nokre av medlemmane spørsmål om eigen valbarheit. Det kom fram at nokre av medlemmane hadde styreverv og/eller tilsetjingsforhold i kommunen. Leiar i kontrollutvalet gjorde ordførar og kommunestyre merksam på desse forholda. Kommunestyret hadde nyval av Sykkylven kontrollutval 12.02.2024 og då fekk Sykkylven kontrollutval for perioden 2024-2027 slik samansetning:

Faste medlemmer	Varamedlemmer
Leonhard Vårdal – leiar	1. Karl Johan Gjævenes
Marit Jørgensen Reite – nestleiar	2. Emte Aure
Stig Ålgårdstad	3. Ingrid van der Velde
Bente Vik	4. Hans Marius Strømmegjerde
Roger Welle	5. Berit Bjørlo
	1. Kjellaug Roald
	2. Jan Ove Skogvold


## Om revisjonen

Sykkylven kommunestyre har valt eigenrevisjon som si revisjonsordning og Møre og Romsdal Revisjon SA som sin revisor.

Møre og Romsdal Revisjon SA leverer revisjonstenester på bestilling frå kontrollutvalet og slik lov og forskrift tilseier. Kontrollutvalet har ei påsjå-rolle for å sikre at kommunen vert revidert på ein forsvarleg måte.

Revisor skal utføre rekneskapsrevisjon, forvaltningsrevisjon, eigarskapskontroll og andre kontrollhandlingar som er bestemt i lov og forskrift. Revisjonen skal mellom anna gjennomføre forenkla etterlevingskontroll med økonomiforvaltninga, og kontrollere grunnlaget for kommunen sitt krav om moms kompensasjon. Revisor utfører også ei rekke andre attestasjonar.

Oppdragsansvarleg revisorar har i tråd med regelverket, lagt fram for kontrollutvalet dokumentasjon på sitt sjølvstende knytt til utførte revisjonsoppdrag. Revisjonen er til stades i dei fleste møta i kontrollutvalet og slik legg ein til rette for ein god dialog.



## Om sekretariatstenesta

Sykkylven kommunestyre nyttar Sunnmøre kontrollutvalsekretariat IKS som sitt sekretariat for kontrollutvalet, og kommunen er medeigar i dette selskapet.

Etter kommunelova skal kontrollutvalet ha eit sekretariat som er uavhengig av både kommunen sin administrasjon og dei som utfører revisjon for kommunen.

Sekretariatet er den viktigaste hjelparen til kontrollutvalet og den som held kontinuiteten gjennom dei ulike valperiodane. For at kontrollutvalet skal kunne fyller kontrollfunksjonen sin på ein best mogeleg måte, er utvalet avhengig av at både sekretariat og revisjon kan vere ein fagleg ressurs og ein fagleg diskusjonspartner. Sekretariatsrådgivarane skal sikre at saker som vert handsama av kontrollutvalet, er forsvarleg førebudde og utgreidde, og at vedtak vert fylgt opp. På same måten som kommunedirektøren skal sikre forsvarleg saksførebuing og vedtaksoppfølging for kommunestyret og andre folkevalde organ.

Sekretariatet skal ivareta dokumenthandtering for kontrollutvalet som eit offentleg organ, og ha eit arkiv som tilfredsstillar krav i arkivlova med forskrifter. Sekretariatsrådgivaren

førebur og effektuerer bestillingar av dei ulike revisjonsoppdraga til revisor og skal ivareta kommunikasjonen med revisor mellom møta.

#### Kontrollutvalet sin aktivitet i 2024:

Sykkylven kontrollutval har i 2024 (tal for 2023 i parentes) hatt 5 (6) møter.

Innkalling med saksdokument vert gjort tilgjengeleg for utvalet seinast ei veke før møtet. Innkalling og møteprotokoll har blitt sendt til medlemmane, ordførar, kommunedirektør og revisjon. Dei same dokumenta vert lagt ut på kontrollutvalssekretariatet si heimeside [www.kontrollutval.no/sykkylven](http://www.kontrollutval.no/sykkylven).

Datoane for kontrollutvalet sine møter har vore tilgjengeleg i kommunen sin ordinære møtekalender for folkevalde organ. Aller helst burde det vore ei lenkje frå denne og til kontrollutvalet si heimeside. Det hadde gjort kontrollutvalet sitt arbeid meir tilgjengeleg og kjent for innbyggjarar, folkevalde og administrasjon.

Sykkylven kontrollutval har i 2024 handsama 26 (33) saker.

Leiar i kontrollutvalet har sete i kommunestyret. Når det er noko kontrollutvalet særskilt ynskjer å gjere kommunestyret merksam på, har leiar nytta høve til å presentere det for kommunestyret.

Dei sakene der kontrollutvalet etter lov og forskrift skal kome med tilråding til kommunestyret, har vorte oversendt som eiga sak med oppmoding om at dei vert lagt fram for kommunestyret utan ugrunna opphald.

#### Økonomiforvaltning og rekneskapsrevisjon:

På vegne av kommunestyret skal utvalet kontrollere om den økonomiske forvaltninga er i tråd med gjeldande reglar og vedtak.

Utvalet får fortløpande informasjon frå revisor, gjennom oppsummering frå interimrevisjon, rapport frå forenkla etterlevingskontroll, informasjon om budsjettavvik, rapport etter årsoppgjersrevisjon og revisor si melding knytt til årsrekneskap og årsmelding.

Revisor har etter forenkla etterlevingskontroll på området tilskot til private barnehagar, gjort kontrollutvalet merksam på at kommunen ikkje leverte grunnlaget for utrekning av tilskot før etter fristen. Kommunedirektøren forsikra at dette var ei eingongshending i 2023, fordi dei ville ha tid til å sikre kvaliteten på utrekninga. Kontrollutvalet oppmoda om at det vart etablert ein praksis som sikra at lovverket vart fylgt på dette området, for seinare år.

Årsrekneskap og årsmelding for 2023 vart levert innan dei fristar kommunelova set. Kontrollutvalet gav sin uttale til årsrekneskap og årsmeldinga 05.05.2023. Til grunn for uttalen låg rekneskap, årsmelding frå kommunedirektør og revisjonsmelding frå revisor, samt den informasjon kontrollutvalet har fått frå revisor gjennom heile årsrevisjonen. Kontrollutvalet uttalte at dei ikkje hadde merknader til årsrekneskap og årsmelding 2023.

Uttalen vart sendt til formannskap og kommunestyre. Kontrollutvalet skal, jf. kommunelova § 14-3, 3.ledd, uttale seg til kommunestyret om årsrekneskap og årsmeldinga før formannskapet innstiller til vedtak.

I sin rapport frå årsrevisjonen 2023 trekkjer revisor fram nokre punkt til forbetring og læring for seinare årsrekneskap og årsmeldingar. Kontrollutvalet merka seg desse forbetringpunkta, og vil følgje med på om dette vidare.


#### Forvaltningsrevisjon og eigarskapskontroll

To av dei viktigaste oppgåvene til kontrollutvalet er å sørge for at det blir gjennomført forvaltningsrevisjon i kommunen og i selskapa kommunen eig, og at kommunen sine eigarinteresser i selskap blir kontrollerte gjennom ein eigarskapskontroll.

Kontrollutvalet skal i kvar periode utarbeide ein plan for forvaltningsrevisjon og ein plan for eigarskapskontroll. For å utarbeide gode planar som får fram kva område som bør kontrollerast, stiller kommunelova krav om at det blir gjennomført ei risiko- og vesentlegvurdering av verksemda til kommunen og selskapa til kommunen.

Kontrollutvalet bad Møre og Romsdal Revisjon SA om å utarbeide ei slik risiko- og vesentlegvurdering. Kontrollutvalet har i gjennom første halvår 2024, vore godt involvert i denne prosessen. Med bakgrunn i rapporten frå risiko- og vesentlegvurderinga utarbeidde kontrollutvalet desse to planane.

Illustrasjonen under viser prosessen frå risiko- og vesentlegvurderingane startar til forvaltningsrevisjonen er avslutta.



I tråd med kontrollutvalet si tilråding vedtok kommunestyret ein plan for forvaltningsrevisjon og eigarskapskontroll for perioden 2024-2027, i sitt møte 16.12.2024.

Det vart ikkje bestilt nokon forvaltningsrevisjon i 2024. Kontrollutvalet si sak om plan for forvaltningsrevisjon vart sendt til kommunestyret i september, men vart dessverre ikkje behandla i kommunestyret før i desembermøtet. Det er ikkje lov- eller forskriftsfesta krav til tidsfrist for kontrollutvalet sine saker til kommunestyret, men departementet legg til grunn at det skal skje utan ugrunna opphald.<sup>1</sup>

### Kontrollutvalet:

Arbeidet i kontrollutvalet er i stadig utvikling. Det kjem jamleg nye faglege oppdateringar og sentrale føringar som kontrollutvalet bør tileigne seg kunnskap om. For at kontrollutvalet skal klare å følgje med utviklinga, krevst det kontinuerleg læring og oppdatering.

Dei fire kontrollutvalsekretariata i Møre og Romsdal arrangerte i fellesskap ein opplæringsdag for kontrollutvala, på Vestnes i januar. Fire av medlemmane i Sykkylven kontrollutval hadde høve til å delta.

På nasjonalt plan er det to organisasjonar som arrangerer faglege samlingar og bidreg til kompetansepåfyll for kontrollutval og for revisjon og sekretariat. Det er Forum for kontroll og tilsyn (FKT) og NKRF - kontroll og revisjon (tidlegare Norges kommunerevisorforbund). Kontrollutvalet hadde for 2024 budsjettert med abonnement og medlemskap i desse organisasjonane, samt midlar til å delta på årleg fagkonferanse eller tilsvarande. Det er viktig å møte andre som er opptatt av kontrollarbeid i kommunane, få fagleg påfyll og utveksle erfaringar.

Sykkylven kontrollutval deltok med nokre av medlemmane på NKRF sin kontrollutvalskonferanse i januar og i juni på Forum for kontroll og tilsyn (FKT) sin fagkonferanse for kontrollutval. Medlemmane gav utrykk for eit godt fagleg utbytte begge stader.

### Til slutt

Sykkylven kontrollutval vil, som kommunestyret sitt eige kontrollorgan, gjere sitt beste for å skape eit aktivt og engasjerande kontrollarbeid, stimulere til forbetningsarbeid på systemnivå og medverke til auka openheit og demokratisk innsyn i den kommunale verksemda.

---

<sup>1</sup> Kontrollutvalsboka – rettleiar frå Kommunal- og distriktsdepartementet